

共八本

鳳凰廳續志

卷八

鳳凰廳續志

鳳凰廳續志卷十一

人物志

儒行

包明漢字秋河祖乾字健堂歲貢衡陽訓導前志有傳
父光晟字成照歲貢肄業南雍旋歸教讀文辭禮節
率以身先自草課幼編用甄後進選慈利訓導未赴
卒明漢天資慧朗十八入廳庠乾隆癸丑歲貢勤懇
授徒從遊甚盛知交會朝瑞趙地靈熊紹濂田宏湘
諸君子傾懷造次皆本德行道藝相切劘世道人心
依爲儀表比值苗氛乍戢化誨綦難田趙尙剛嚴曾

熊崇謹飭明漢寬柔煦嫗但重涵濡時稱造就雖殊
成立則一嘉慶中授興甯訓導與縣令張偉分最投
聘主資甯書院羣材景附館舍至不能容每令大兒
安容傳語攝高足焉道光庚寅告休回籍壬辰冬卒
年八十九先一年辛卯安容由恩貢舉鄉闈明漢猶
及見之於儒望中享壽獨高居恒辭氣靄如下筆千
人辟易功深養到藝苑稱宗子二人長安容舉人官
桂陽縣教諭另有傳次安金道標屯守備諸孫順緣
順忻官把總死疆事順章優廩生士俊道標候補千
總所著古文時藝詩賦藏稿於家

曾世澤字雨村父朝瑞歲貢生品學兼優傳詳前志趨
庭兩少子雖老督訓惟嚴長世崧另有傳世澤自幼
循齊甫齟而孤卽耽憤悱未冠饒聲譽旣入學謁觀
察傳重莽一見稱奇厚助膏薪俾就麓山卒業是時
初平大亂肇建新屯飾治崇文編分解額嘉慶戊辰
恩廣制科世澤遂成名爲邊號開荒首舉旋赴大挑選永
興訓導誨誘殫勤再由截取選荆門水利州同承辦
堤工不辭勞瘁旦夕圖修吏職而惟蠲獎佐徵一事
尤州人所尸視永懷也居官凡雜丹鉛課士手頒程
式大府欽其粹博咸豐辛亥一恩科鄉試奏充同

考官得人稱盛後二年臻七十以禮告休家居視聽
弗衰兆寶崖觀察聘掌敬修書院詩文講貫較殷於
官訓導時更數稔卒壽八十二著有雨村課草行篋
小草諸集待梓子炳軍功縣丞

趙廷魁字鼎臣世居溪北桐坡因以爲號父地靈恩貢
生永明教諭淵才碩德前志書之過庭操訓極嚴廷
魁慧性虛心誦維該洽童歲入廳學研求靡懈而趨
督愈勤鄉榜偶見遺歸塾輒嬰夏楚重葺傳觀察嘉
憫之爲資送會垣使得觀風嶽麓羅鴻臚山長嘆賞
其文誘掖甄陶遂領嘉慶庚午鄉薦計偕三上歸理

舌耕負笈趨從遠方胥至巡道王素園雅敬其賢聘
主錦江書院疏經決蕘霽漑益多生平厭設圭稜自
然方雅形充氣沛操峻量洪家居不省資儲遇物純
忘畦町問業無賢不肖皆藹然開說卒年五十四諸
子映台映奎列庠廩映階映紫膺叙銜映辰藍翎守
備映斗死疆事孫樹榮優廩生所著桐坡課蕘試帖
待刊

由興梅號燮堂世居新場屬治牙約會祖祖蕃歲貢茶
陵學正前志有傳祖父皆庠序興梅少聰穎弱冠知
名遭亂流移貧不廢學嘉慶初傳重庵廉使方總邊

勦賊特重儒生愛其文恒培護之辛酉四年登選榜
拔貢成均再試京闈不中就職南旋滿銓資授臨武
教諭臨武外周粵嶠風近縉華興梅尙樸誠勤課肄
敦廉介以矯之經數稔士皆崇實文質彬彬旋因制
服去官教澤人咸頌美在籍厯主雅麗觀瀾明山諸
書院中式道光元年辛巳恩科鄉舉再選常甯教
諭壬辰江華徭匪亂鄰境戒嚴南北兩省齊出師當
事以興梅居邊地練習軍情調勦戎務逾時歲事督
師盧敏肅公上其績保知縣歲辛丑年七十五致仕
歸後一年卒畢生無疾言遽色公私酬應道味充然

弟興棟歲貢巴陵訓導另有傳子三應煌應熙庠生
應熊業儒孫景鏞庠生所著詩文藏爲世守

包安容號臨堂宅卜沱江左岸別號東溪父明漢有傳

見前安容擅清門承家學資尤敏捷博極羣書爲文

奧衍閎深力追先輩試補廩庠最早道光辛巳恩貢

年正壯辰谿孫秋崖進士主講敬脩引爲論文友不

盡抗顏以父任興甯學官老近衰恒隨侍養凡署中

衡文獎掖悉贊爲之故自道咸以來興邑賢材輩出

大都爾日就聞詩禮人也中辛卯恩科舉人會闈

一不中歸里奉親護道番禺姚補之稔其賢聘主本

廳書院督誨慇懃士風丕變冠時翹楚盡出其門掌
教二十餘年咸豐己未選授桂陽縣教諭諸生景服
請業滋多辛酉卒於官年八十在世心無適莫氣象
溫恭見者知不知皆肅然起敬子六人仲順緣鎮箠
把總死疆事五順章優廩生長孫存珍附生次孫存
瑜雲騎尉世職藍翎都司現任龍陽營守備所著時
文試帖及古近體詩文數種彙稿藏家

滕家正號松亭父興貴嘉慶初年平苗官外委暮年生
兩子家正占先垂髫孝友端凝專心力學將冠列庠
廩淵雅著稱兩尊人壽近八旬設館授徒以脯脩供

甘旨庭闈雍肅遐邇化之庚寅歲貢登道光乙未
恩科鄉薦甫入都鎮城患作某鎮性貪黷信讒張虐
激衆譁譁適弟家清以千總攝領官銀被扣牽連賠
累計資千兩公車北返適當省檄嚴追罄產規償罔
周什二期紓弟患獨任張羅雖貨徧周親貧無卒歲
弗憫也叨遇後來觀察夙耳賢名咨展護持且延掌
教乾州俾搏館金填蝕款艱營數稔寸積銖儲卒能
完欠免辜保全同氣厯主立誠錦江觀瀾敬脩諸書
院迴環百數十里植土基多一皆敦品重行不僅文
章粹贍也咸豐初截取知縣以城防功加六品銜同

治壬申卒年七十六律身嚴毅接物謙和每當橫逆
紛投旁觀胥爲忿忿已則怡然達堪輿尤專醫理識
精操秘應手如神生子三雙雲理先疇青雲庠生六
品銜職教諭章雲花翎遊擊孫兆年藍翎把總餘孫
曾數人皆業儒所著詩文四六裏集俟刊

楊兆瓊字雅林原名通昶先世多武職父正紳鎮筸左
營外委性嚴毅瓊資本中人邃勤於學初師舉人包
臨堂道光初年辰谿孫進士均銓掌教敬脩喜瓊專
慤曲誨之文名遂著歲乙酉拔貢入成均考充武
英殿校錄書成選石門教諭丁酉外艱歸丁酉領鄉薦

再選城步教諭六上春官不第咸豐癸丑髮逆寇江
南節相 奏瓊隨委後二年咨赴鄧忠武公行營理
文案贊畫兵機丁巳克復甯國保陞同知直隸州選
湖北黃州岐亭同知次年克復南陵黃池保請開缺
以知府用旣引

見假求還里楊海琴觀察延掌敬脩書院黔苗擾邊總稽
團務叙功晉道銜同治十年夏病感積勞遂卒年七
十一當戊戌禮闈報罷歸養授徒一時詩古文辭蔚
然興起厥後軍旋主講力振文風穆藹端勤彌多造
就處世不虛然諾久爲鄉里推崇會道光十六年封

疆失馭貨扣乖方萬口喧曉禍將不測兆瓊以正辭
開解衆意稍寬迄不逾時再遭橫決又復苦心疏瀹
得以罪歸渠孽辟無濫施雖當時風影誤加不遑較
也至今談氣節者恒念感弗諉云所著有潭月閣制
荻已付刊此外古文二卷駢文四卷古今體詩十卷
藏家待梓子夢巖以道員殉節貴州蹟詳忠烈傳孫
壽昌騎都尉

曾世崧字秋湄父朝瑞有高行前志備書之二子生晚
年世崧居長與弟世澤俱以淵源家學擅譽當時而
崧遣興詩歌縱談籌策豪情勝慨特有專長麗製鴻

篇文壇領袖嘉慶癸酉拔萃貢成均端居推獎後賢
淡心榮利道光初泗州陳雨峯鎮軍來官鎮軍總兵
交契最深兵紀陣圖每資商確崧旣通品陳亦將材
時稱鎮軍營政甲楚南贊畫居多歲癸巳以疾卒年
六十生二子式遵先緒親督發蒙繪有桐陰課子圖
題詠最多長毓琪由行伍官藍翎遊擊銜乾州守備
次奎齡恩貢生軍功光祿寺署正銜儘先教諭所著
詩文內外集待梓

胡學文字質存世居廳城東郭祖興太學生父德盛軍
功八品善醫俱隱德耆年當時尊重學文性貞介篤

孝聰明童牙博藝能文好施疾惡旣冠聲名卓著補
博士弟子員時廳有冒躡膠庠者逕請駁歸原籍覺
序秩然嘉慶己卯由恩貢入成均挾藻圖雍課試恒
叨優獎一時海內知名之士半與交遊以清高倜儻
見稱兩試京闈不第就州倅職遂南旋家居文酒率
真主持風教者十餘稔道光壬辰病卒年五十在日
制行嚴峻不信妖邪宅後故近山齋櫺忽頽百金莫
知所自罵擲之奇裁大作資糧暗竭廬舍自焚甚之
再濯鬱攸夷然弗顧後得張真人法怪乃除遠近驚
傳咸欽定力代精靈素購藥賙貧迄今整肅家風克

遵遺訓子五人諸孫均祿花翎副將君仁君心並以
死綏列祠祀君正藍翎鎮標外委均明藍翎道標把
總所著詩文醫經雜纂數種待刊

熊朝簡字心齋父紹濂耆德孝行傳詳前志族姓世承
儒業忠厚著聞朝簡弱冠列廩庠美聲譽持身恂正
里黨尊崇三薦省闡不售遭時擾攘養志娛親嘉慶
四年恩貢叙城防績加六品銜設帳於家束脩敦素
施教以窮經爲主爲文勁鍊鮮尙辭華道光初年廳
司馬黃竹安延課眾孫最隆賓禮歲庚寅卒年六十
四自苗平後名師首包曾田趙與朝簡之父紹濂壹